

quas a dominis abbate et priore Vallis sancte Marie receperamus sub hac forma:

(VIII.) „Jo[hannes] Dei gratia abbas, H[.....] prior Vallis sancte Marie dilectis in Christo H[einrico] quondam abbati in Walchenreth, C[onrado] decano Sancti Andree in Hildensem, magistro W[ilbrando] canonico Bremensi salutem et sinceram in Domino charitatem. Intelleximus ex consultatione vestra, quod die ad audiendos testes prefixo super causa, que inter venerabilem dominum Bremensem archiepiscopum et venerabilem dominum Verdensem episcopum vertitur, arbitrio nostro commissa ex parte capituli Bremensis, ne procederetis ulterius, ad dominum papam est appellatum, cuius occasione appellationis, an procedere deberetis necne, a vobis est dubitatum, et super hoc nos consulere voluistis. Unde communicato consilio cum venerabili fratre abate de Amelungisborne, qui vobiscum, frater Heinrice, super hoc perso[naliter] est locutus, respondemus vobis, quod secundum formam arbitrii inter predictos archiepiscopum et episcopum initi, eujus ordinationi nos interfuiimus, et secundum tenorem scripti inde confecti occasione talis appellationis omittere non debetis, quin in cause ipsius cognitione, secundum quod inter partes convenit, procedatis, quod vobis commissum est, diligenter exequentes. Ego H[.....] prior Vallis sancte Marie, quia proprium sigillum non habeo, sigillo domini mei abbatis sum contentus.“

Deinde pars episcopi Verdensis proposuit coram nobis, quod secundum formam arbitrii, qua cautum est, ut, per quamcumque partium steterit, quominus arbitri procedant, illa pars causam perdat, archiepiscopus cecidit a causa, cum ipse cause processum impedierit subtrahendo episcopo copiam probationum, cuius testes ad ferendum testimonium, sicut tenebatur, non coegit, licet de hoc quam sepius fuisse commonitus et rogatus, sicut ex actis satis liquet. Item cum super appellatione capituli Bremensis placuisset archiepiscopo et arbitro ejus, magistro Wilbrando, haberi consilium abbatis de Amelungisborne et suorum collegarum, episcopo Verdensi